

1607

mune hoc pacis publicæ bonum omni vigore animi incumbat, injunctum. Solerio Senatus consulto responsum: *Si Carolus Venetias venerit, Patres non modo, verum cunctos civitatis ordines bilari animo ipsum excepturos.* Ad-dita Solerio lautia, quingentorum aureorum torquis dono datus. Eodem tempore Castillioneus Venetias pervenit. Se una cum Sabaldo a Cæsare ad Rempublicam legatum, in-quit: illius adventum, ita eo consentiente, ut, quo loco negotium esset, intelligeret, progredi voluisse; responsum quamprimum Senatus expectare. Quæ ideo hactenus acta fuerant, quæque Regum legatis recitata; eadem Senatus consulta fuerunt significata. Cum eo responso postridie discedens Romam proficiscitur.

Interea tumultus apud Rhætos magis in dies augebantur. Cum enim trium circiter millium peditum præsidium Vulturenæ valli imposuissent, neque eorum spei a foederatis satis-factum sibi videretur, ne pecuniam a Republica exhibitam reciperen, transalpinis perscripserant: duoque Rhætorum præfeti, Fuentani promissis onerati, Mediolano in suas ditiones se contulerant, infimam plebem in proceres concitaverant, intestinum ac civile bellum aluerant, cuncta seditione repleverant. Itaque Rhæti ad Jantum oppidum concilium indixerant, in quo de transitu ex foedere Venetis permittendo ageretur: neque enim in id proceres, absque omnium consensu, ea rerum perplexitate ac turbatione, consentiendum existimaverant. Eodem tempore literæ a Joanne Baptista Padavino, Decemvirum scriba, e Lotharingia afferebantur; quibus literis ea, quæ cum Helvetiis ac Vaudemontio egerat, continebantur: *Per Tigurinos, Bernates ac Basilienses Helvetiorum pagos pertransisse; trium peditum millia, per eorum fines externo militi transitum obtinuisse; inde lente admodum militibus Reipublicæ nomine conscribendis operam navari cognovisse; idque Pontificis literis effectum, quibus Carolum Patrem ac Cardinalem filium, ne Venetis opem ferrent, horribatur, rogabat: indignum esse, ut, qui catholicæ religionis semper propugnatores fuerant, modo in ipsum Pontificem arma induerent: non de Francisci Vaudemontii filii, qui jam muneris sibi a Venetis injuncti tempus expleverat, dignitate agi;*

*Franciscus
Castillio-
neus Mar-
chio a Cæ-
strio Vene-
tias venit.*

*Rhætorum
tumultus
Fuentani
comitis
opera exci-
tatus.*

*Pauli Pon-
tificis litera
ad Lotha-
ringiæ Du-
cem, ne Ve-
netis mili-
tes conscri-
bi permit-
tar.*